



Stigtingsjaar 1909

Tel. 086 133 3786  
 Faks 012 001 8787  
 E-pos: akademie@akademie.co.za  
 Webwerf: www.akademie.co.za

Ziervogelstraat 574  
 Arcadia, Pretoria

7 April 2021

**MEDIAVRYSTELLING**  
 (Vir onmiddellike vrystelling)

**SA AKADEMIE BETREUR TAALDEBAKEL OP STELLENBOSCH**

Die Suid-Afrikaanse Akademie vir Wetenskap en Kuns spreek haar ernstige kommer uit oor die gebeure die afgelope paar weke by die Universiteit Stellenbosch, een van Suid-Afrika se top universiteite, oor die gebruik van Afrikaans op sy kampus en ook die konseptaalbeleid wat pas bekend gemaak is. Hierdie stand van sake het ontaard in 'n onbehaaglike debakel wat wyd in die Afrikaanse taalgemeenskap veroordeel word.

Die bevordering van Afrikaans as 'n akademiese taal ten behoeve van die beoefening van die wetenskap en tegnologie in al sy vertakkinge is reeds meer as 'n eeu die sentrale missie van die SA Akademie en haar meer as 950 lede wat almal oor gevorderde nagraadse kwalifikasies beskik. Die Akademie plaas 'n hoë premie op wetenskap- en beroepsbeoefening in diens van die Suid-Afrikaanse gemeenskap deur die mensekapitaal van ons lede. Ons kommer oor die taalkwessie by Stellenbosch spruit uit die waarneming dat een van ons land se inheemse tale, en daarby die jongste taal uit Afrikabodem wat die afgelope eeu tot volle wasdom as 'n wetenskapstaal ontwikkel het, se waarde klaarblyklik deur die Universiteit Stellenbosch geringgeskat word.

Die Akademie betreur die toenemend verbeeldinglose tegnokratiese omgang van Stellenbosch met die werklikheid van veeltaligheid en hoe dit sedert 2014 manifesteer in hierdie universiteit se taalbeplanning, -beleid en -implementering. En dít desondanks die taalgebruiksprofiel van die universiteit se primêre voedingsgebied waar Afrikaans die mees gebruikte taal is. 'n Wesenskenmerk van die Wes- en die Noord-Kaap is juis die ryk kulturele en talige diversiteit waarmee hierdie provinsies geseën is en waaruit Stellenbosch sy primêre studentekorps trek. Hierdie diversiteit behoort immers as 'n hulpbron benut te word in diens van sy primêre voedingsgemeenskap. Kennelik beskou die Universiteit Stellenbosch egter hierdie diversiteit as 'n lastige probleem wat sistematies wégbestuur moet word in hulle strewe na 'n verskraalde eentalige wetenskapskultuur en internasionale statuur, ten álle koste.

Dit is onbegryplik dat die Universiteit Stellenbosch se konseptaalbeleid slegs 'n kopknik waag in die rigting van sy gemeenskap se talige en kulturele diversiteit. Die vraag wat gevra moet word is of hierdie uitmuntende universiteit, wat 'n nuwe generasie moet toerus om hulle plek vol te staan in 'n postpandemie, ontwikkelende land met 'n wankelende ekonomie en gewelddadige

samelewing, werklik sy roeping in hierdie konteks begryp?

Uitnemende universiteite tree immers eerstens in 'n bevrugte vennootskap met hulle onmiddellike en naasliggende gemeenskappe. Suid-Afrikaanse universiteite durf nooit in hierdie dae in 'n hovaardige, eensydige bo-na-benede verhouding met hulle gemeenskappe te staan deur 'n "vyandige omgewing" te skep waar Afrikaanse studente "mikroaggressie" ervaar, soos wat Stellenbosch se eie Departement Afrikaans en Nederlands pas aan sy Rektorat moes uitwys nie.

Die SA Akademie doen 'n beroep op die Universiteit Stellenbosch om sy jongste konseptaalbeleid grondig te hersien deur 'n taalwetenskaplik verantwoorde en raadplegende taalbeplanningsproses van stapel te stuur. Stellenbosch se voedingsgemeenskap verdien dit.

Prof. Anne-Marie Beukes  
Hoof- uitvoerende beampte, SA Akademie vir Wetenskap en Kuns  
Selfoon: 083 675 8053  
E-pos: [ambeukes@akademie.co.za](mailto:ambeukes@akademie.co.za)